

# PROPAGACIÓN DO CAMPO ELECTROMAGNÉTICO NUN CONDUTOR

## 1. Un pouco de teoría

Nesta práctica estudaremos como se propaga o campo electromagnético a través dun condutor. Ao contrario do que viñemos considerando nas prácticas anteriores nas que a onda electromagnética era completamente reflectida polo condutor ao chegar a el, observaremos que non sempre ocorre así. Para condutores reais, caracterizados por teren unha condutividade ( $\sigma$ ) finita, atoparemos un determinado réxime no que o campo electromagnético é capaz de atravesar o condutor. Veremos de que xeito o fai e que lle ocorre aos campos eléctrico ( $\mathbf{E}$ ) e magnético ( $\mathbf{B}$ ), dependentes do espazo ( $\mathbf{x}$ ) e do tempo ( $t$ ).

Antes de poñernos co experimento, cómpre pensar un pouco que é o que nos di a teoría respecto da propagación en condutores. Se nos preguntamos como resumi-la teoría do electromagnetismo, a resposta é coas 4 **ecuacións de Maxwell**:

$$\begin{aligned}\nabla \cdot \mathbf{E} &= \frac{\rho_f}{\epsilon} \\ \nabla \cdot \mathbf{B} &= 0\end{aligned}$$

$$\begin{aligned}\nabla \times \mathbf{E} &= -\frac{\partial \mathbf{B}}{\partial t} \\ \nabla \times \mathbf{B} &= \mu \mathbf{J}_f + \mu \epsilon \frac{\partial \mathbf{E}}{\partial t}\end{aligned}$$

onde  $\epsilon$  e  $\mu$  son as constantes dieléctrica e magnética respectivamente,  $\rho_f$  a densidade de carga libre e  $\mathbf{J}_f$  a de corrente, son as chamadas fontes dos campos  $\mathbf{E}$  e  $\mathbf{B}$ .

Nestas ecuacións notamos que aparecen acoplados os campos  $\mathbf{E}$  e  $\mathbf{B}$ .

Vexamos agora como se aplican en distintos casos:

- **Baleiro**


No baleiro non temos cargas libres nin correntes,  $\rho_f = 0$  e  $\mathbf{J}_f = 0$ . Introducendo isto nas ecuacións de Maxwell, multiplicándolas polo rotacional  $\nabla \times$  e aplicando certas identidades vectoriais, chegaríamos ás seguintes ecuacións que desacoplan os campos  $\mathbf{E}$  e  $\mathbf{B}$ :

$$\begin{aligned}\nabla^2 \mathbf{E} - \mu \epsilon \frac{\partial^2 \mathbf{E}}{\partial t^2} &= 0 \\ \nabla^2 \mathbf{B} - \mu \epsilon \frac{\partial^2 \mathbf{B}}{\partial t^2} &= 0\end{aligned}$$

Abofé que xa recoñecéche-la forma que teñen estas ecuacións. Efectivamente, trátase de ecuacións de ondas (fíxate nas derivadas segundas con respecto ao espazo e ao tempo). Se particularizamos para o caso unidimensional, por exemplo na dirección  $x$ , a solución para o campo eléctrico é a dunha onda plana, cuxa parte real é:

$$E(x, t) = E_0 \cos(kx - \omega t),$$

onde  $E_0$  é a amplitude do campo,  $k$  o vector de onda e  $\omega$  a súa frecuencia angular. Debuxemos esta función para ver como se propaga o campo eléctrico no baleiro:



vemos que no baleiro o campo electromagnético propágase de forma sinusoidal e con amplitude constante no espazo.

### • Condutor

Nun bo condutor podemos considerar que non temos cargas libres acumuladas, así que  $\rho_f = 0$ . Porén, si que vai existir unha densidade de corrente libre. Sabemos que segundo a lei de Ohm esta será  $\mathbf{J}_f = \sigma \mathbf{E}$  [1]. Así que, se introducimos isto nas ecuacións de Maxwell, multiplicamos polo rotacional  $\nabla \times$  e aplicamos outra vez as identidades vectoriais, chegaríamos ás seguintes ecuacións que desacoplan os campos  $\mathbf{E}$  e  $\mathbf{B}$ :


$$\nabla^2 \mathbf{E} - \mu\epsilon \frac{\partial^2 \mathbf{E}}{\partial t^2} - \mu\sigma \frac{\partial \mathbf{E}}{\partial t} = 0$$

$$\nabla^2 \mathbf{B} - \mu\epsilon \frac{\partial^2 \mathbf{B}}{\partial t^2} - \mu\sigma \frac{\partial \mathbf{B}}{\partial t} = 0$$

vemos que estas ecuacións difiren das do baleiro só no termo da derivada primeira temporal. Recordando un pouco de materias como Mecánica I ou Métodos Matemáticos IV-V, identificaremos estas ecuacións como de ondas amortecidas. Novamente, particularizando na dirección  $x$  e para o caso de bos condutores ( $\sigma \gg \omega\epsilon$ ), a solución é a dunha onda plana amortecida, con parte real:

$$E(x, t) = E_0 \cos(\beta x - \omega t) e^{-\beta x},$$

onde o novo parámetro  $\beta = \sqrt{\frac{\omega\mu\sigma}{2}}$  é o coeficiente de atenuación [2]. Debuxemos  $E(x, t)$  para ver como se propaga o campo eléctrico no condutor:



Vemos que, ao chegar ao condutor, o campo eléctrico comeza a atenuarse debido á exponencial negativa  $e^{-\beta x}$  que multiplica ao coseno (o coseno está modulado pola exponencial). A maiores, se nos fixamos na expresión que obtivemos para o campo  $E$  no condutor observamos que dentro do coseno aparece un termo  $\beta x$  que engade unha fase ao campo. Polo que o condutor, á parte de atenuar, introduce un desfase entre os campos antes e despois de atravesalo. Todo iso en función da frecuencia do campo!

As solucións no baleiro e dentro do condutor que vimos para o campo eléctrico son análogas para o campo magnético. Na seguinte sección explicaremos o experimento que imos realizar para comproba-la teoría que vimos de desenvolver.

### Notas desta sección

[1] Aquí simplemente expuxemos un pouco a teoría e relacións que precisamos para poder face-la práctica. Podedes atopar unha discusión máis detallada sobre a propagación do campo electromagnético en condutores no capítulo 9 (sección 9.4) do libro *Introduction to Electrodynamics* de David J. Griffiths.

[2] Nota a dependencia de  $\beta$  coa frecuencia angular  $\omega$ . No noso caso, por estar tratando cun bo condutor, o coeficiente de atenuación e o de fase coinciden. Bótalle un ollo ao Griffiths para ver o caso xeral.

## 2. Experimento e tarefa a realizar

No seguinte vídeo vén explicado o experimento que nos axudará a ver como se propaga o campo electromagnético dentro dun condutor. Ao visualizalo trata de fixarte nas seguintes cuestións:

- Que instrumentos se empregan para xera-lo campo electromagnético?
- Cal é a dirección de propagación do campo electromagnético xerado?
- Que se utiliza para medi-lo campo eléctrico antes e despois do condutor?
- O que medimos no osciloscopio é directamente o campo eléctrico ou é outra cousa?
- Por que imos facer un varrido coa frecuencia do campo electromagnético?




### PROPAGACIÓN DO CAMPO ELECTROMAGNÉTICO NUN CONDUCTOR



(<https://youtu.be/PhSxtpFu8k>)

Aquí tes un esquema dos dispositivos experimentais utilizados nesta práctica:



Alguns dos datos que precisas para completa-la práctica son:  $R_1 = 10.0$  mm,  $R_2 = 7.5$  mm,  $N_1 = 100$  espiras e  $N_2 = 200$  espiras. Grosor do cilindro condutor  $d = 1.0$  mm. A forza electromotriz inducida  $V$  nos solenoides de medida vén dada pola seguinte ecuación:

$$V = 2\pi r N E$$

onde  $r$  é o raio do solenoide correspondente,  $N$  o seu número de espiras e  $E$  o campo eléctrico que induce a forza electromotriz nel e que será o que queremos medir de forma indirecta.

O seguinte programa en python simula o experimento. Terás que introduci-lo valor para cada frecuencia ( $f$ ) [1]. O programa darache a forza electromotriz inducida fóra ( $V_1$ ) e dentro ( $V_2$ ) do condutor. Tamén che dará o desfase entre eles ( $\phi$ ). A idea é facer un varrido en frecuencia e completa-la seguinte táboa:

$f$ (Hz)	$V_1$ (V)	$V_2$ (V)	$\phi$ (°)
----------	-----------	-----------	------------


$f$ (Hz)	$V_1$ (V)	$V_2$ (V)	$\phi$ (°)
100			
150			
200			
300			
500			
700			
1000			
1500			
2000			
3000			
5000			
7000			
10000			
15000			
20000			
30000			
50000			
70000			
100000			

Corre o seguinte código (shift+enter) tantas veces como precisas ata ter completada a táboa [2]:

```
In [2]: %run -i "propcondu.py"
```

-> Escribe en Hz a frecuencia (f) que queiras introducir no xerador de sinal e pulsa ENTER:

-> Imaxe que veriamos no osciloscopio, a liña contínua amarela é  $V_1$  e a liña a trazos azul é  $V_2$ :



-> Resultados das medidas:

Forza electromotriz inducida  $V_1$  (V): 1.03  
 Forza electromotriz inducida  $V_2$  (V): 0.2  
 Desfase (°): 152.7

Agora, coa táboa completa, xa podes realiza-las seguintes análises:

- Dos datos que obtiveches poderás obter o campo eléctrico fóra ( $E_1$ ) e dentro ( $E_2$ ) do condutor. Terás que realizar unha gráfica na que pintes o cociente  $E_2/E_1$  como función do logaritmo da frecuencia ( $f$ ) [3,4]. Representa tamén  $E_2/E_1 \cos(\phi)$  e  $E_2/E_1 \sin(\phi)$  como función do logaritmo da frecuencia. Que interpretas dos resultados? Poderíamos dicir que o condutor actúa como un filtro? De que tipo?
- Outra das medidas que obtiveches é o desfase  $\phi$  entre os campos dentro e fóra. Sabendo que  $\phi = \beta d$  e que o condutor non é magnético (isto é,  $\mu = \mu_0$ ), obtén a condutividade ( $\sigma$ ) do cilindro.

Moi ben, xa temos unha idea do que lle ocorre a unha onda electromagnética nun condutor como función da súa frecuencia, olla o seguinte vídeo e trata de responder á cuestión que nel se formula.



(<https://youtu.be/EYFhZhnxDNY>)

No vídeo o xerador de corrente envía un sinal triangular ao solenoide que crea o campo electromagnético. Despois mídese o sinal dentro do cilindro condutor. Observamos que, se a frecuencia do sinal é baixa dentro do condutor, medimos un sinal triangular; pola contra, se a frecuencia é alta, ao atravesar o condutor o que obtemos é un sinal sinusoidal. Explica por que ocorre isto.

#### Notas desta sección

[1] Non confundir  $f$  con  $\omega$ .

[2] Recomendóche anota-os datos nunha folia de cálculo que che permita analizalos posteriormente con maior facilidade. O código introduce un pequeno erro de xeito aleatorio en cada unha das medidas. Polo que cada vez que realices unha medida a unha mesma frecuencia esta non será completamente igual. Se che interesa, recorda que podes abrir o código e fozar nel!

[3] Podes pinta-lo eixo x da frecuencia en escala logarítmica.

[4] A relación entre os campos dentro e fóra do cilindro non vén determinada pola onda plana atenuada que vimos na primeira sección. A relación entre os campos é algo máis complexa e vén dada pola seguinte ecuación:

$$E_2 = \frac{E_1}{\cosh(\beta d) \cos(\beta d) + i \sinh(\beta d) \sin(\beta d)}$$

## Por se quixeres cavilar máis

Noraboa por ter rematado a práctica de hoxe. Se aínda segues aquí é porque quedaches con gana de pensar un pouco máis sobre o que estivemos a ver.

No seguinte video musical aparece Miguel Mosqueira, guitarra e unha das voces das Ataques Escampe. Podes velo co móbil na man saíndo do metro na estación de Chambers Street, New York. Hoxe en día, a maioría de grandes cidades que teñen metro permiten ir conectadas ao whatsapp, instagram ou google maps para non perdernos e saber en que parada baixar. Este tipo de telecomunicacións funcionan con frecuencias da orde de GHz. Pero... segundo o que acabamos de ver na nosa práctica... ¿é entón posible comunicarse no metro cun móbil? Terase que implementar algún sistema para que a comunicación sexa posible?



(<https://www.youtube.com/watch?v=wDu9W01DHuo>)